

何大復先生集

第四册
卷之十四
七言歌行三十六首
卷之十五
五言律詩八十三首
卷之十六
五言律詩八十四首
卷之十七
五言律詩八十二首
卷之十八
五言律詩八十二首

特別

八16

1268

4




和六
門
1268
分

何大復先生集卷十四

七言歌行三十六首

赤壁圖

周郎舳舻大江半曹氏旌旗眼中暗當時萬馬下中原
江水千年餘斷岸黃州逐客玉堂仙停舟到此悲
秋天龍爭虎鬪慨往事酹月酬風懷昔賢古人今人
皆已矣吁嗟丹青乃誰子赤壁之山只如此



劉武選百鳥圖

嗚呼鳳凰不可見人間百鳥空啁啾西飛鷓鴣五
色滿眼誰別集鸞儔劉侯此圖愛者衆盡手莫識元
與宋粉繪剝落絹素新萬羽千毛尚飛動侯言此畫
先人傳珍藏未肯充南貢什襲翻令錦繡輕百年轉
見丹青重頃來數相見手携登我堂開圖見百鳥從
此雙鳳凰鷓鴣黃鳥黑隱可辨行鳧立鷺遙相望延頸
戢翼各拱向宛如萬國臣妾朝天王君不見蜀道阻
絕岐山已頽瀟湘無人衡岳崔嵬竹實未結桐花不

開鷓鴣怨杜鵑哀鳳兮鳳兮何時來

畫竹

殷君示我林垵竹臨風寫雨奪天巧尺縑蒼筤只兩
根氣勢已覺千林少虬蟠鳳起倏有神出雲入霧何
縹緲聞君魯門西草堂萬竿白日森烟霜怪道君身
瘦如竹只對此君不食肉

雷黃門凱旋圖歌

漢家賊盜臨京都西衝河塞東海隅虎豹奔突豺狼
呼天子九重怒按劍將軍五道催飛符黃門鐵鞞

按營壘監視將軍奉 天子征者不憂居者喜曉戰
遙隨金鼓前晝行獨擁旌旗裏烟沙忽傳畿甸清黃
門奏捷旋神京將軍歸來 天子迎冊書十萬納御
府勲級三千羅紫庭封侯拜將珥貂列白金緋衣照
雲月黃門功多不自說受爵元看陸機小却賞誰知
魯連潔高堂白日披圖新戎衣慘澹猶風塵坐令慷
慨悲今辰書生從此識汗馬丈夫常憶畫麒麟

呂黃門畫竹歌

黃門持此竹云是溫徽筆初聞一葉掃風雨迥出千
竿貫霜日層沙曲澗開煙湍高天雲影樓榭寒黃門
峻節與之比手排閭闔呈琅玕琅玕摧折鳳不食咆
哮扁豹天門黑鷗鳴鳩啼百草死誰看青青滿林色
君收此幅今西行雷電隨入蒲州城龍盤懈谷山中
石更待伶倫截鳳笙

彭中丞四民圖歌

漁舟暝入桃花渚春山如聞樵採音高原犁鉏破烟
雨書閣窈窕穿松林中丞雅愛山水障清晨自掛高
堂上綠樹逶迤轉衆流白雲合沓開層嶂萬里寧論

戰伐功百年宛見昇平象憶昨寇盜日橫行中原白骨
哀蒼生携男抱女路斷絕痛哭不見天邊城漁奔
樵竄學士徙縱有隴畝無人耕 至尊九重憂旰食
命公殺賊賊始平近郊無復戎馬迹比屋仍傳雞犬
聲明公壯年心許國何況此身際日月二載驅馳掃
漢南一時談笑清河北出閩三分大將旗來朝獨擁
諸軍節樂土重開白日光普天不動黃塵色即今西
戎忽復驕朝廷親遣霍嫫姚已聞土魯還金印又見
中丞下赤宵形像雲臺猶未畫姓名麟閣早須標開

圖更賦出車什四海甲兵從此銷

桃源圖歌

昔我遊武陵坐石窺花源岸坼丹洞闕風迴綠蘿翻
崩崖奔古月沓嶂響哀猿行車一以過始知人境諠
真陽仙令欲南往手持新畫來相訪武陵山水久不
覩今晷置我高堂上巖穴如聞雞犬聲村墟但見桑
麻長髣髴潭水濱點綴桃花春山川似晉代衣服猶
秦人回首茫然一煙霧尋源誰復知真處投簪福地
終有期畫中先認桃花樹

吳偉江山圖歌

吳偉老死不可見人間畫史空嗟羨吾觀此卷江山
圖飄然意象臨虛無想彼濡毫拂絹素酒酣落筆神
骨露萬里青天動海岳空堂白日流雲霧洲傾岸側
波嶺銜島嶼倒影翻源潭江邊萬舸一時散中流颺
颺開風帆崩濤湧浪勢難久漁子舟人各回首去鴈
遙知七澤中落花誤認桃源口烟峯蒼茫貌二叟面
髮衣冠頗齷醜石林莎草恣點染舒卷滄洲在吾手
憶昨宏治間偉藝實絕倫供奉曾逢萬乘主招邀數

過諸侯門京師豪貴競迎致失意往往遭呵嗔由來
能事負性氣輒軻貪賤終其身嗚呼吳生豈復作身
後丹青轉零落殘山剩水片紙貴百金購之不一得
此卷流傳天地間我即見汝真顏色

張季升望雲圖歌

黃門身在青雲上眼中白雲日南望白雲飛入楚山
裏封君之堂應在此俞卿善畫更能賦畫間青瑣開
縑素晴窓落筆白雲生寫出黃門萬里情

獵圖歌

邊沙蕭蕭天北風高林晝屯鞍馬雄
裝束身手健真與此圖形貌同冬寒獵傍長城窟城下平原日
將沒呼鷹放犬無不為數騎彎弓競馳突月高琵琶
海西城拂廬雪乾毼能輕金鍾虜酒亦易醉玉腕
騮驕不行白髮老黃戰裙抽箭仰視天山雲衆中
若認射鵰手漢家誰是李將軍

畫馬行

畫馬如畫龍縱橫變化當無窮吾觀月山子落筆窺
神工曾向天閑貌十馬十馬意態無一同此馬傳來

幾百年古絹猶開沙漠風樹裏河流新過雨簇簇草
芽寒刺水圍人雙牽臨水邊草色離離亂雲綺令人
疑到渥洼傍波底風雷鬪龍子細看不是白鼻騮恐
是當朝獅子花紫燕織離各惆悵其餘駑劣何足誇
憶昔愛馬不惜千金貨君王勤政樓頭坐黃衫
雙繡靴廐中騎出樓前過紅帕初籠汗血香玉鞭輕
拂桃花破吁嗟玩物竟何益遺跡徒使丹青播只今
烽砲西北來沙場未聞千里才千里才固有時回頭
為問御者誰君看赤驥與騏驎挽車太行嶺心期田

方集 卷十四 水
千方踟躕駕轅項霜凋首藉漢郊冷骨折秋風自嘶
影君不見古人養馬如養士一飽能酬千里志今人
養馬如養豚廐下常堆蒺藜刺古之良馬何代無可
笑今人空按圖

畫鶴篇

昔聞少保寫青田古墨千年人不傳郎君此幅何時
得蕭颯秋堂掃烟色雪翎風翼如有神萬里出海誰
能馴我初見此鳥重是仙人禽朝飲玉河湄暮宿元
圃林回首寒江鳧與鴈日晚哀鳴羨霄漢

赤壁圖歌

老瞞橫槩江之臯眼中吳越一秋毫吳人殼弩來江
左江頭鳴笳畫舉火旌旗飄揚北風前舳艫化作江
中烟英雄一去音塵滅斷水殘山弔詞客白雪堂寒
草煙暮黃泥坂下臨臯路酒酣喚客吹玉簫江風山
月不待招昔時霸業那足數鶴夢悠悠眇千古回首
東坡百世人圖畫蒼茫空有神

畫山水

蜀溪繭紙明如練并州剪刀碧雲斷泥金作繪誰所

為華堂粉壁光凌亂
枳花竹葉春江曲
江頭無人水空綠
逶迤石徑林中出
草碧沙明淨
江日欲覓秦人
武陵下不見溪
遙種桃者高樓窈窕
鎖煙霧只疑行
盡瀟湘路瀟湘却憶
舊時遊紙上煙波生
暮愁

畫菊歌

楊郎畫菊只三本
千花萬草無顏色
夏卿墨竹差可比
陶生桂樹何須得
徐君向我誇所有
閣中携此更携酒
翠幔披雲出院遲
金杯映日凭闌久
深黃穠紫雜烟
舉想見五色臨揮
毫叢篁瑣碎白晝
靜錦石爛

熨霜天高楚江茅堂若在眼
鳳闈彫闢對秋晚
白葛飄零處士稀
朱絃寂寞佳人遠
寒香晚節真可惜
哉楊郎不在前
開窓為我拂絹素
落筆點綴黃金錢
徐君徐君珍重此
君不見天寒歲暮
百草死綺羅無地
看桃李

題文與可畫竹上有東坡山谷題識

客從南方來見予手持錦軸長
丈餘云是與可之畫
蘇黃書中堂展玩思超忽
四百年來真故物
敗素飄零色已改
古墨慘澹神猶發
文生此竹世希有一枝

不異雙瓊玖冥冥煙幹動石壁瑟瑟風葉臨窓牖筆
下何須掃萬竿曾中已自橫千畝眉山長公元擅場
豫章太史誰可當片言相推四海重隻字尚使千年
藏客從何處得此幅令我嗟嘆久憐惜蘇黃不作與
可死人間書畫無真跡勸君寶此勿輕擲

題黃車駕畫竹

畫竹忌屈不忌直息齋由来有筆力今之畫圖幾百
年人間尚自留真墨空堂畫掛風雨寒明滅纖霧生
微瀾細觀見竹不見畫何時石上削此三琅玕八閩

高士黃司馬平生好文兼愛畫碧草停珂夏省中白
雲捲幔晴窓下每逢賓客出評品遂使破素增高價
開圖似惜孤鸞叢胡為寫置荆棘中君不見洞庭之
上瀟湘岸翠篠脩篁沙草亂鳳凰不棲鷓鴣怨

吳偉飛泉畫圖歌

長安獨過田子舍留我一玩飛泉畫絕壁如聞風雨
來晴天安得蛟龍掛吳生跌宕得畫理潦草落筆皆
可喜飛泉却出沓嶂間山即真山水真水客堂六月
生畫寒耳中髣髴高江灘源潭窈窕不可測波浪洶

湧多竒觀泉邊二老顏色異偶坐似是莊與惠萬里
誰論到海心百年詎識臨淵意偉哉田子今儒宗文
標南指匡廬峯不須對此更惆悵會觀瀑布青天上
杉風松日隔縹緲雲瀧雪瀨何雄壯我常夢往神空
向豈無吳生好手筆為我寫寄廬山障

畫魚

大魚昂藏若人立衝波跋浪風江急傷觀二鯉各有
神倏忽波濤隨出入中堂鬚鬣動杳冥坐久始識為
丹青青天萬里拂絹素筆力咫尺開滄溟禹門天池
雲霧裏白晝雷霆行地底何人有力移置此酒酣相
視一改容只愁化作三蛟龍

題大司馬王晉溪先生十牛圖

君不見將軍臺閣龍圖張何人畫牛司馬堂十牛戢
角垂其耳掛之中堂見者喜風林煙草恣牧放水涉
沙眠無觸觝黃犍黑牯舐肉真司馬堂中安用此豈
知此物公所珍展畫似對桃林春高亭青松拂赤日
南山白日消黃塵攻駒不羨三千牝考牧還歌九十
樽尚書况登本兵部天營十二屯貔虎南征北伐運

籌策破 擄戎在樽俎已看神武藉經綸要使蒼生
有環堵蒼生十年望蘇息海內荒城久荆棘犁鋤未
慰三農心輸輓空嗟萬夫力我知明公分主憂坐
寇盜安王侯沙場之地皆田疇盡却戰馬歸耕牛君
不見中堂此圖日張掛丹青照耀麒麟畫

點兵行

先皇簡練百萬兵十二連營鎮京觀團營十萬更精
猛嗚呼耗減今無半昨傳胡入白楊城有勅點選營
中兵軍中壯丁百不一部遣老小從征行自從御馬

還內廐私家馬肥官馬瘦富豪輸錢脫籍伍貧者驅
之充介冑京師土木歲未已一身百役無不受禁垣
西開鎮國府內營晝夜羅金鼓四家驍健三千人出
入扈從圍龍虎邊頭城塹誰營屯遂使犬羊窺北門
天清野曠恣剽掠百里之內煙塵昏肉食者謀無遠
慮倉皇調發紆皇顧即今宣府大失利殺將覆軍不
知數遼東兵馬久已疲朶顏反覆非前時又聞迤北
外連結朝廷坐失東藩籬往時京邊士苦樂今頓異
且如私門卒食糧日高坐此兵昨一出見者淚交墮

從令荷戈趨戰場身上無衣腹飢餓君不見府中搥
牛宰羊猪穿域蹋踣行吹竽高馬肥肉留京都可憐
此兵西擊

遊獵篇

周王八駿行萬里朝遊崑崙暮滄海驅霆策電徧天
地虜駭龍馳倏煙靄犇戎造父兩為佐大人王母遙
相待千金白狐來四荒螻蟻下國輕天王君不見秦
皇叱咤後九有海東驅石石為走橋邊孺子如婦人
博浪沙中鐵椎吼又不見武皇旌旗日絡繹射蛟潯

陽江水赤五陵俠少夜相遇探丸殺吏還驚辟天門
蹇我城九重虎豹為衛蛟龍宮紫微鈎陳翼帝座至
尊祗合安高崇脫淵之魚出山虎白龍魚服何勞苦
沉江距河勢有然萬乘反遭匹夫侮君不見曹家老
爽誠愚蒙平生不識司馬公死生禍福在人手寧能
常作富家翁一門流血豈足惜坐使神器歸奸雄昨
夜昌平人夢天龍文赤日燒燕川城中莫辨真天子
道上傳看七寶鞭腐儒為郎不扈從願奏相如諫獵
篇

觀吳進士舞劍歌

我來江夏吳郎宅夜觀吳郎舞劍起古匣塵埃鐵生
繡玉珥金環為予理燈前照耀雙寶刃蛟龍盤拏雷
怒號仰瞻南斗有紫氣却顧東海無波濤吳郎別我
適南國萬里開樽動顏色我亦將之五岳遊須爾仗
劍芟虺蜮不然持此擊名王况今闕塞風塵黃酒酣
自覺神益揚左揮右霍秋月光吳郎蛇矛更精突牆
頭角弓力十斛平生豪俠真可憐耳熱白眼看青天
嗟哉此宅不足展君舞室卑地窄難迴旋

柳絮歌

長安三月百花殘滿城飛絮何漫漫千門萬戶東風
起陌上河邊春色闌美人高樓鎖深院白花濛濛落
如霰晴窓窈窕朝日遲亂入簾櫳趁雙燕遊絲相牽
時裊裊委地飄廊不須掃君不見江頭綠葉吹香綿
隨波化作浮萍草

明月篇 并序

僕始讀杜子七言詩歌愛其陳事切實布辭沉著
鄙心竊效之以為長篇聖於子美矣既而讀漢魏

以來歌詩及唐初四子者之所為而反復之則知
漢魏固承三百篇之後流風猶可徵焉而四子者
雖工富麗去古遠甚至其音節往往可歌乃知子
美辭固沉著而調失流轉雖成一家語實則詩歌
之變體也夫詩本性情之發者也其切而易見者
莫如夫婦之間是以三百篇首乎睚鳩六義首乎
風而漢魏作者義關君臣朋友辭必托諸夫婦以
宣鬱而達情焉其旨遠矣由是觀之子美之詩博
涉世故出於夫婦者常少致兼雅頌而風人之義

或缺此其調反在四子之下與暇日為此篇意調
若髣髴四子而才質猥弱思致庸陋故摘詞蕪紊
無復統飭姑錄之以俟審聲者裁割焉

長安月離離出海嶠遙見層城隱半輪漸看阿閣銜
初照澹澹黃金波團圓白玉盤青天流景披紅藥白
露含輝汎紫蘭紫蘭紅藥西風起九衢夾道秋如水
錦幌高褰香霧開瑣闌斜映輕霞舉霧沉霞落天宇
開萬戶千門月明裏月明皎皎陌東西柏寢岩堯望
不迷侯家臺榭光先滿戚里笙歌影乍低濯濯芙蓉

生玉沼娟娟楊柳覆金堤鳳凰樓上吹簫女蟋蟀堂
中織錦妻別有深宮閉深院年年歲歲愁相見金屋
螢流長信階綺櫳燕入昭陽殿趙女通宵侍御牀班
姬此夕悲團扇秋來明月照金微榆黃沙白路逶迤
征夫塞上行憐影少婦牕前想畫眉上林鴻雁書中
恨北地關山笛裏悲書中笛裏空相憶幾見盈虧淚
沾臆紅閨貌減落春華玉門腸斷逢秋色春華秋色
迥如流東家怨女上粧樓流蘇帳捲初安鏡翡翠簾
開自上鈞河邊織女期七夕天上嫦娥奈九秋七夕

風濤還可渡九秋霜露迫生愁九秋七夕須臾易盛
年一去真堪惜可憐揚彩入羅幃可憐流素凝瑤席
未作當釭賣酒人難邀隔座援琴客客心對此嘆蹉
跎烏鵲南飛可奈何江頭商婦移船待湖上佳人挾
瑟歌此時憑闌垂玉筋此時滅燭斂青蛾玉筋青蛾
苦織怨絨怨含情不能吐驪色春妍桃李蹊遲輝晚
媚菖蒲浦與君相思在二八與君相期在三五空持
夜被貼鴛鴦空持暖玉擎鸚鵡青衫泣掩琵琶絃銀
屏忍對箜篌語箜篌再彈月已微穿廊入闥靄斜輝

歸心日遠大刀折極目天涯破鏡飛

邯鄲行

邯鄲道上車馬多行人夜火渡漳河邯鄲女兒年十五
能彈琵琶善歌舞青燈朱戶夜當壚壚頭酒熟喚
客沽玉壺青絲為君繫不妨醉向邯鄲途君不見邯
鄲市昔日繁華安可擬鳴鸞佩玉青雲間鬪雞走馬
紅塵裏平原門前客如雲千載淒涼竟何是黃金白
壁成飛灰歌樓舞榭空流水傷心萬事俱可嗟草長
叢臺白日斜廢苑當時在何處舊宮今日作誰家古
來富貴俱寂寞有酒樽前胡不樂

元明宮行

君不見元明宮中滿荆棘昔日富貴今寂寞祠園復
為中貴取遺構空傳孽臣作雄模壯驪凌朝廷遠
勢連袞跨城郭憶昨已巳年來事秉權自倚薰天勢
朝求天子苑暮奪功臣第江艘海舶送花石戚里
侯門擁金幣千人力盡萬牛死土木功成悲此地碧
水穿池象溟渤黃金作宮開日月虹蜺屈曲垂三梁
蛟龍盤擎抱雙闕城中甲第更崔嵬親戚弟兄皆闕

閱撼里歌鐘賓客遊排門冠劍公卿謁生前千門與
萬戶死時不得一邱土石家遊魂泣金谷董相然臍
嘆堦塢宮前守衛無呵呼真人道士三四徒石戶蒼
苔生鐵鎖玉階碧草採金鋪星宮晝開見行鼠日殿
夜禱聞啼狐遊客潛窺翠羽帳市子屢竊金香鑪桑
田須臾變滄海桃樹不復栽元都我朝中官誰最貴
前有王振後曹氏正統以前不得聞成化之間未有
此明聖雖能斷誅罰作新未見持網紀天下衣冠
難即振時復起古來禍亂非偶然國有威

靈豈常恃元明之宮今已矣京師土木何時止南海
猶催花石綱西山又起金銀寺君不見金書追奪鐵
券草長安日日迎護勅

苦熱行簡問陶良伯

六月二十火雲發京師毒熱勝吳下清晨衣冠不敢
出對食欲餐汗滿把閉門袒跣真羨狂隱几寤寐何
由假風雲昨日忽入城疾雷破墻雨破瓦此地樓臺
更鬱蒸西山殿閣空瀟灑姑蘇才人玉堂客鄰近不
得同杯斝因君欲訪姑蘇臺臺下清江千尺瀉土有

萬竿脩竹林干雲蔽日森炎夏君不見九衢亭午日
如赭鳥飛投林獸奔野紅塵騎馬何為者

脩竹篇

君不見真翁堂下竹貫日干雲千尺高亭亭萬木避
霜色颼颼空巖迴翠濤平生直節本無偶手栽琅玕
種瓊玖風月何曾忘此君松梅况自稱三友東曹郎
君翁所竒節槩更與翁名齊神龍昔向滄波化彩鳳
今從玉樹樓高堂茲辰開壽籙却洗金盤對春竹霓
旌畫下仙人車雲管宵停羸女曲翁家舊住上林西
托根自近蓬萊池雪崖氷柱映樓閣雨露常沾萬歲
枝

七夕詞

雙星渡河月西沒悲參怨商愁夜獨宵闌箕斗自低
昂心憐情恨看七襄人生失意無賤貴寒機織婦駕
鴛思金屏玉瑟宮娥淚

同崔呂孫三內翰集徐子瞻辰樓

秋日徐君北樓上北樓峩連北斗窓牖臨觀日下
花闌干坐拂天中柳南州孺子美如玉北門詞客同

大德集 卷十四
杯酒咫尺金門接玉堂碧霄共立空翹首

晚雨君卿招不赴

騎馬出門還復入六月陰晴不可卜簷前星出乍有
無城上雨來時斷續炎天留客夜苦短燕地近秋暑
偏酷何人同對寺中花憶爾獨伴啼鴉宿

觀石鼓歌

我來太學謁孔廟下觀戟門石鼓陳之果詎楚幾埋
沒此石照耀垂千春苔昏蘚澁讀難下蟲彫鳥剥細
不分古畫詰曲蛟龍隱石氣慘淡烟霧氛周王功勳

史籀筆數石散落岐陽濱中興氣象豈復覩大篆意
格誰曾聞先秦文字稍近古兩漢摹搨多失真六朝
以來尚靡麗鍾王往往稱通神唐韓宋軾遍歌嘆長
篇險韻何悲辛大觀之間入汴國君王好藝崇斯文
高駝巨艦遠載致金填玉嵌傳相珍靖康乘輿忽播
蕩保和玩物隨烟塵神驅鬼守散復聚至寶豈得空
沉淪 文皇北來定燕鼎不置太廟留成均博士無
煩上書請諸生頗得親講詢虛廊畫壁安置穩大厦
長簷覆蓋新不隨鐘鼎怨磨滅已與琬琰爭嶙峋平

生博覽愛古跡世上墨本徒紛紛此雖殘缺歲已久
尚覺隻字輕千緡璧池日月動華袞奎閣星斗羅貞
珉嗚呼孔廟在萬世此石與廟長無湮

同李進士觀銅雀硯歌

君不見鄴中魏帝無宮殿千秋遺瓦磨為硯墨客騷
人空嘆嗟朱薨綺構誰曾見李君好古精鑒別冬天
拂拭開煙雪虛堂叩之哀玉音泥沙洗出黃金屑廣
州紫石鸚鵡眼歛山龍尾何希罕濡藻光迴星漢垂
蟠花背刻龜螭斷共憶高臺羅綺春翠眉艷骨飛黃
塵捉携故物悲年代感慨新章泣鬼神君不見臨漳
此物難復覩河沉岸圻求者苦縣人相傳為贗古嗚
呼日掘西陵土

太白山歌 秦集

我聞太白橫西域百里蒼蒼見寒色靈源萬古誰窮
探雷雨窈冥巖洞黑中峯迢迢直上天瑤宮玉殿開
雲烟千盤萬折不到頂石壁鐵鎖空高懸陰巖皚皚
積古雪絕壑長松幾摧折鳥道斜穿劍閣雲龍潭倒
映峨眉月高僧出世人不知飛仙凌空笙鶴隨洞天

福地在咫尺，悵望塵海令心悲。

子昂畫馬歌

學士宋王孫，畫馬皆龍姿。曾馮飛黃出天廐，尚留雲影落瑤池。池頭馬官錦靴袴，緩轡長牽時拂顧。萬里精神開絹素，百年毛鬣生風霧。吁嗟內乘無人識，想見奔騰過都國。翠仗朱軒數往來，金羈玉勒增顏色。只今天子罷南征，又聞東巡遼海城。安得四馬忽然生，登臺一顧千金輕。天上常隨八駿行。

何大復先生集卷十四

何大復先生集卷十五

五言律詩八十三首

避雨山舍望見蒲圻縣 以下使集

向晚蒲圻道，遙聞雞犬喧。斜光入深巷，踈雨過閑門。縣市渾依水，人烟只類村。蕭條燈火夕，沽酒共誰論。

景港渡

秋臨景港渡，澄波生綠苔。舟移遠岸動，帆掛好風來。

斜日畫旂捲中流清吹哀榜人歌未罷前導已相催

辰溪縣

早蒺辰溪渡清川喜泛舟山城歌粉堞江驛映朱樓
雨驟沙頽岸天寒水露洲蠻音聞漸異迢遞動鄉愁

沅水驛四首

小驛孤城外陰森草樹幽晚涼憑水榭秋雨坐江樓
絕域鴻難到空山客獨愁夜深歸渡少漁火照汀舟

二

去國日以遠登樓思故鄉雨來江氣白日出市烟黃

島嶼秋逾靜軒窓晚更涼憑高凝竚久槐影下微陽

三

長劍向燈看休歌行路難巖窓懸石溜江檻殺風湍
城古蒹葭夕堂空蟋蟀寒幾回青瑣闥朝罷想鳴鸞

四

江上西風起蕭條暮雨頻山樓連堞壘郡路入荆榛
懷古過沅水悲秋弔楚臣芷香堪採掇思寄日邊人

沅州道中四首

山行多雅興十里幾人家林葉垂朱實蹊藤落紫花

方集 卷十五
緣崖防轉石，傷岸畏頽沙。不見前溪堡，遙聞奏暮笳。

二

歲月驚長道，風塵惜舊綈。鈞雲盤曲磴，沿月遡迴溪。
南國疲征斂，西戎厭鼓鼙。山深正愁絕，落日鷓鴣啼。

三

共說關門險，岧嶇不可攀。山峯藏曲折，澗道瀉潺湲。
絕壁人愁下，長林鳥倦還。官程元有限，行旅敢辭艱。

四

向夕人烟近，肩輿歷翠微。驛花明去節，山霧上征衣。

果熟收梨棗，蔬香煮蕨薇。開樽對佳客，且喜吏人稀。

平溪

徙倚平溪館，天高秋氣清。水螢光不定，山籟響難平。
夜火雲間戍，寒楓江上城。終宵無夢寐，高枕聽灘聲。

清浪

駐旌清浪衛，半日費攀躋。窓迥開千嶂，城高控九溪。
征徭無楚戶，耕種有蠻妻。愁問滇南道，迢迢隔嶺西。

李叅謀府二首

叅謀開夕宴，邀我坐深更。暇日遊觀少，清時號令平。

旌旗巡哨堡鼓角啟嚴城莫笑書生腐樽前解論兵

二

高衙赫宏敞鎮坐撫南蠻畫戟環千士雕甍插萬山
秋高鼉鼓振風靜虎旗閑聞道西戎亂將軍莫破顏

鎮遠三首

古郡青山下經過駐使車土官迎 詔拜蠻客望城

遮疊嶂營孤壘清江繞百家晚來官署裏獨坐詠皇
華

二

地僻先搖落空亭長綠莎山川連蜀道市井雜夷歌
旅篋衣裳少秋程風雨多無人相問訊盡日撫寒柯

三

寥落古城池斜光照戍旗關臨苗子砦洞入長官司
殊俗終難近蠻音久易知踟躕暮江上又是仲秋時

查城十五夜對月五首

中秋看月色移席近前楹河漢三更沒關山萬里明
風煙依獨戍砧杵閉空城此夜高堂上多應念遠征

二

天上何所有團團白玉盤
可憐秋半月只是客中看
影直朱樓午輪高青嶂寒
美人何處共光彩隔雲端

三

驛舍山東下閑吟月出歌
婆婆籠夕桂窈窕入雲蘿
玉魄中天滿清輝近水多
廣寒高幾許臺殿鎖嫦娥

四

小市無兼味鄰家酒亦慳
佳期三五夕遠客萬重山
霄漢分秋色風塵照旅顏
去年當此夜坐對紫薇間

五

我愛秋宵永西林待月斜
百年幾圓缺今夜倍光華
兄弟俱殊土田廬有舊家
金波如客淚獨洒向天涯

安南

崎嶇踰嶺路到郭已昏鐘
城險苗難近關高賈不通
郊烟秋牧馬崖日暖收蜂
民俗殊中域生涯亦頗同

送孫教諭

三年別燕市萬里喜相尋
祿少供親膳官清任士林
板輿迎白髮芹舍擁青衿
莫謂蟠龍久風雲起碧岑

永寧舟中

霜降水還漕舟行不覺勞
順風歌浪疾亂石下灘高
漁舫依紅蓼人家住白茅
鄉園待歸客應已熟香醪

江門

小店江門市孤舟聞暮砧
遠沙含細雨缺岸隱疎林
旅宿青楓晚人煙翠嶽深
漸臨巴蜀道一慰望鄉心

灩澦

霜落夔門樹寒江灩澦孤
狂瀾瀕此障砥柱賴誰扶
入峽愁孤客當關用一夫
何勞念西域千載固輿圖

峽中

自昔偏安地于今息戰侵
江穿巫峽隘山鑿鬼門深
濁浪魚龍黑寒天日月陰
夜猿啼不盡淒斷故鄉心

旅行

日暮行湘水春深別上都
繫舟南斗近倚劍北雲孤
骨肉千行淚風塵萬里軀
王孫江上草何處采薜蘿

滹沱河上

以下家集

長堤枕春郭斷岸入殘暉
栖鳥張燈起驚鳧解纜飛
古人堪墮淚吾道豈常非
未識臨河意中流擊柝歸

渡淮

津口風翻旆春陰鬱未開淮流衝古岸沙店倚長臺
鳥向平蕪下人隨返照回未忘舟楫興臨路獨遲徊
贈劉大參

自識文翁化佳聲滿大藩野人看露冕稚子望行軒
草色青春細棠陰白晝繁東風應有意先到宛陵原
寄陰舍人

卧病春城暮相思汝水潯紫微鸞掖遠碧草鳳池深
鳴珮他年夢看花此日心故知俱散盡北望一沾巾
雨霽

斷雨懸深壁餘雷振遠空蒼林橫落日碧澗下殘虹
萬井波光靜千家樹色同何因共朋好歸詠舞雩風

雨

獨坐浮雲起徘徊夕照孤長風生遠樹細雨入平蕪
暗牖飛蟲落高林宿鳥呼昭回曾有侶此日慰田夫

鳴蟬

仲夏鳴蟬集窓臨碧樹陰清心吾愛爾長日自悲吟
露葉朝栖靜風林夕響沉偶通觀物理幽意坐來深

送孫太守

五馬朝天日傾城出餞時倪寬行考最何武去留思
碧草朱輪動青雲皂蓋移
聖朝崇漢吏功業正當
期

五月望月食

月食逢中夏山城黯黯陰孤燈今夕淚哀角萬方心
霧嶂看初滅一作滅風簾望轉沉光無遠復齋坐及
更深

葵

春後群花盡孤葵且自芳弱莖依井上勁幹拂簷長

衛足全生理傾心倚太陽幸因佳客至採掇薦中堂

立秋寄獻吉

山城一葉下水榭已迎秋夜迫商風至天空大火流
稍蘇司馬病翻遣宋生愁日暮關河外思君重倚樓

寄樊國賓

不見樊卿久空憐歲月長愛書王逸少癖畫米元章
業紹青緇舊名沾玉牒香十年相會地燒燭對秋堂

沱西別業

使君方擁郡別業枕沱湄城倚章華殿山藏大禹祠

大後集 卷十五
賭碁憐謝傅看畫憶王維未是懸車日烟雲入夢思

東昌公哀詞

東昌公奄沒已踰三時痛悼之餘篇什尚缺然其情未可已也於是作哀詞五首

壯志空寥廓中年與世辭露寒青草夢風慘紉荆悲
入政光前輩傳經實我師大蘇碑不忝慚繼子由詞

二

岳城淹六紀東郡未經年別駕王祥勝彈琴子賤賢
一官猶黑髮萬事已黃泉銘石看遺績淒涼太史篇

太史康
德涵也

三

江海悠悠逝那堪死別情向平婚未畢卓宰宦初成
夜雨原花落秋風墓草生九京何日返空復望佳城

四

復魄黃河遠歸程汝路偏素車臨故域華表立新阡
室女啼秋夕鄉人弔墓田蕭條風雨候愁絕對床年

五

一自封泉室偏驚節序除白楊悲北郭青草蔓荒墟

天地存亡裏江湖涕淚餘
寂寥身後事不忍讀遺書

中元夜月

片月東城上長風度早秋
光臨青嶂影抱碧潭流
灑氣沉沙浦餘輝戀水樓
何人更吹笛關塞不勝愁

西郭

西郭樓遲地寒山夕景繁
雞豚歸故道鳥雀下秋園
閒戶林風入沿坡草露翻
香旂夜來熟歲暮足盤飧

穫稻

穫稻妻孥喜中宵尚築場
但堪供俯仰那復問倉廩

合畝黃雲盛翻匙白雪香
更須催釀酒溪上鯉魚長

夢何粹夫

內翰同鄉客新知交更深
春從都下別秋向夢中尋
圖史留東觀詞章侍上林
中宵憶顏色慰我索居心

晚歸自溪上

秋到城西樹緣溪落葉多
數家連水竹一徑入煙蘿
廢井寒螿聚閒牕暮雀過
濯纓聞孺子燈下六悲歌

客至

蓬門斷來往草徑自荒蕪
有客何方至呼兒問濁醑

彈琴待風月把酒話江湖更枉新詩贈長吟興不孤
登樓二首

眇眇憑高暮淒淒景物間秋陰生巨壑雲氣度西山
一郡寒烟畔千門落照間此時瞻北極萬里欲飛攀

二

縹緲東樓上長凭興不慳病來踈眺望秋至廢躋攀
日落河山暮風迴草樹斑夜殘猶未倦坐待月臨關

同沈清溪夜坐二首

細雨侵高樹空堂散鬱蒸詩成揮彩筆話久落青燈

鳳字慚稽牀龍門愧李膺瑤琴多古操數為拂朱繩

二

移席留長坐更深雨漸繁竹寒庭鶴警燈靜壁蛩喧
舟楫淹歸計琴書代晤言知君多雅興常過蔣生園

雨夜似清溪二首

院靜聞疎雨林高納遠風秋聲連蟋蟀寒色上梧桐
短榻孤燈裏清笳萬井中天涯未歸客此夜憶江東

二

微雨初搖颺風吹灑更長冥冥來石壁颺颺近秋堂

螢火流深塹鷓鴣下淺塘吳歛當此夕哀切興難忘
雨後邀馬君鄉

寂寂楊雄宅琴書誰與同青山過片雨白日抱殘虹
塵榻還堪卧清樽未可空相看城郭暮那忍負秋風

雨中和清溪

濛雨蕭條至悲風日暮多積陰生徑草永夜落庭柯
宅愧高人隱門勞長者過白鷗如有意相逐下烟波

清溪草堂

沈子高吳人也構草堂於清溪之上以為隱居焉

今年北遊至申來訪予道清溪之勝遂為作詩四
首

草閣臨溪上幽期孰與論白沙連曲岸秋水到開門
檻外常垂釣舟中數舉樽風情有如此不異浣花邨

二

夜夜聞清瀨朝朝見碧潄百年應有寄終日自長吟
宿槩依沙樹開窓散渚禽生涯衆人事不獨愛幽深

三

隱者常稀澗幽居獨羨君汀洲起漁唱籬落倚鷗群

水接吳門樹，窓生禹洞雲。更傳詩句好，還似沈休文。

四

太湖湖上地，聞占好園池。有業堪投老，無官可避時。
渡傳桃葉詠，門聽竹枝詞。何日山陰棹，溪堂見戴逵。

懷高鐵溪先生四首

積雨空林畔，庭除烟霧昏。佳人不我至，樽酒向誰論。
野樹斜連屋，秋山遙對門。何時孤興發，騎馬到荒村。

二

吾慕高夔府，風流漢長卿。新詩裁錦字，麗賦擲金聲。

早謝人間事，幽通物外情。相違動旬月，何日見黃生。

三

磊落真邦彥，襟期心我師。右丞元好畫，謝傅未忘碁。
花鳥留新興，雲山待妙詞。小堂能枉駕，一為細論詩。

四

僻居臨水次，竹樹稍深幽。對景非無酒，登高亦有樓。
好風吹永夜，片月度清秋。不見孤舟至，令人憶子猷。

八月丁日

孔庭嚴祀典，冠冕萃吾鄉。霄漢迴清樂，星辰入畫裳。

萬年仍俎豆千仞自宮墻此日斯文地瞻依病未忘

初度

此日逢初度悲懷却自寬久為京洛客初乞茂陵官
堂上慈顏喜燈前稚子懽一杯承膝下願得歲相看

夜

地遠柴門靜天高夜氣淒寒星臨水動夕月向沙低
入室喧虫語張燈住鳥啼自然幽意慳不是戀深棲

陰

慘澹長陰合蒼茫四望同地秋還易雨樹晚故多風

樓閣山寒裡衣裳水氣中農家務收穫早為豁層空

吾州

遼邈吾州地名從申伯來通淮一水下入楚萬峯開
舊國無遺廟寒城有廢臺秋郊獨臨眺懷古意悲哀

北望

北望風塵裏遙思日月邊山河臨地極樓觀倚星躔
翠羽開諸國金甌至萬年自從歸病後常夢五雲前

贈張合之秀才二首

張子元奇士携書過我林激昂高論氣落魄遠遊心

一飯山家晚孤燈夜雨深城邊有岐路送爾獨長吟

二

匹馬何時出還家此日心卞生懷楚璧郭隗待燕金
雄劍青雲志哀絃白雪吟功名少年在不必淚沾襟

雷

不見蒼山破虛聞巨壑馳烈聲迴地底餘響落天涯
翹翹何由避蛟龍得自隨中宵沛雲雨威澤正當時

月二首

宛宛秋山月今宵尚未圓光生萬里外影對一樽前

城靜虛弓倚樓高破鏡懸草堂風露下終夜不成眠

二

片月中秋近輝光一歲無天清驚塞鴈夜冷落楓烏
不寐知宵永無言對影孤更深何處沒萬里墮江湖

三關

楚塞三關隘雲峯入望重何年戎馬地空有昔人蹤
積水沉秋堞長煙帶古烽乾坤當失據饕餮任群兇

九月

九月清霜下中林蕙草寒暮霞多變態秋色不宜看

丘壑容吾拙乾坤敢自安古來俱涕淚况復歲華殘

何大復先生集卷十五

何大復先生集卷十六

五言律詩八十四首

樊秀才園內菊

樊生園內菊相對小塘西露蕊淒淒放風枝裊裊低

栽一作種依石竹下一作開與晚蘭齊明日重陽酒殷

勤為爾攜

九日同馬君卿任宏器登高四首

歲歲重陽菊開時不在家那知今日酒還對故園花
野靜雲依樹天寒鴈聚沙登臨無限意何處望京華

二

遠地宜登望秋光薄暮濃樓高窺萬井潭迥落千峯
花為重陽發人懷百歲逢同遊俱俊彥尊酒得從容

三

病思逢佳節孤懷憶遠遊河山還似昔煙樹不勝秋
故國浮雲去高臺日暮愁牛山元有恨休訝淚長流

四

向夕楓林爽行吟未擬回明霞積水外落日古城隈
鼓角秋深怨風霜歲晚催莫將遲暮意孤負菊花杯

登釣臺

野濶窮秋出雲寒望未開萬峯遙駐馬殘日更登臺

水落龍蛇蟄

一作
卧

沙空鴈鴛來孤懷對搖落吟罷有

餘哀

孟冬

孟冬嚴氣至坐見物華微古樹猶秋色寒山半夕暉
江湖深欲凍鴻鴈各知歸羸病便深卧從茲日掩扉

寄孫世其舉人

得意西風裏
賓筵聽鹿鳴
此生看事業
今日重科名
錦樹連江路
秋花照楚城
北來休太晚
慰我隔年情

除架

苦葉蕭疎久
秋匏委沙
家人空抱蔓
山鳥莫啼花
零落親寒事
蹉跎感物華
衰榮轉相代
何必恨生涯

十月

十月蒼山靜
孤村帶郭長
卜居憐此地
高枕復吾鄉
野霧沉寒日
城陰遲早霜
一年看欲暮
酒熟共誰將

懷孟望之

消息三秋隔
虛瞻鴻雁群
長安望不極
落日起浮雲
奉使何時出
吟詩誰共聞
豈知離索久
病思日紛紛

寒

水郭逢寒早
城陰慘澹中
遠山常霧雨
衰柳更天風
病骨思狐貉
愁顏付酒筩
關河待冰雪
何處有途窮

殘菊

寒叢後搖落
冬至六蹉跎
病葉強相守
孤英無奈何
園籬空自愛
霜霰暮還多
幸有餘香在
深杯為爾歌

韓席二僉憲見過留飲

野外慚供給臺端枉駕來
河魚還自取樽酒為君開
落木寒風急孤城暮雨催
相逢孟冬節翹首待陽回
晴

冬郊零雨霽煙郭里初分獨樹餘
寒照平沙足晚雲
風鳶高不下野鶴迥難群
夕坐親杯酒長歌還自聞
雪東沈馬任三子

黯黯山雲起茅齋傍水涯
一冬纔見雪十月已開花
霧裊寒城霰風吹野岸沙
同遊詞賦客騎馬入誰家

喜望之至以詩迎之

經歲青山下空吟求友詩
故人天上至慰我病中思
臘近冰霜苦春回草木知
小堂終日待枉駕莫教遲
再別清溪子

冬館蕭條別開樽為爾吟
岸梅催客鬢江柳送歸心
南國浮雲暮孤城積霰陰
逢春湖雁起休滯北來音
得錢水部書

故人俱落魄水部近何如
河上三年別天涯十月書
煙波愁望裏風雨夢魂餘
更枉懷人一作停雲作長吟淚

滿裾

懷沈子

沈生南國去別我獨悽然落月清江樹歸人何處船
十年安陸舍數口太湖田想到鄉園日生涯亦可憐
別望之

相送不得遠臨水一悲歌行雲暮不止遊子意如何
楚塞風烟迥燕關雨雪多春還問消息尺素莫蹉跎
洪法寺別錦夫邃伯

古寺垂楊裏樓臺落照暉重來舊遊地却與故人違

雲樹千山暗風花三月飛未將湖海淚空灑路傍衣

寄孫世其

世路渺難定相期未有涯昔為燕地客常到楚人家
繫馬中堂樹聽鶯上苑花故園看北斗腸斷憶京華

酬葛時秀

罷歸翻自喜舊業有青山積雨稀來客孤雲獨往還
良朋枉高倡撫卷一開顏何日還乘興題詩到竹間

懷葉時華

佳人湖上住亭榭迥堪憐手把青荷葉行吟綠水邊

客皆蓮社友人是竹林賢欲繫空庭馬聞君高樹蟬

雨夜

雲薄高城上孤亭郡郭西暗中螢火度燈下草蟲啼
零落同遊客淒涼舊雨題高歌視雄劍慷慨為誰携

遊賢隱寺次馬君卿韻

繫馬長松下風煙幾日留天高還薄暮地迥更逢秋
孤嶂開僧舍千峯繞佛樓自能來白社不用遠公求

與孫世其晚坐

留客江村暮開尊對浦沙池心上孤月樹杪落殘霞

地僻唯宜竹秋高未有花琴書堪晤語隨意宿山家

十四夜

水際浮雲起孤城日暮陰萬山秋葉下獨坐一燈深
白露蒹葭落西風蟋蟀吟關山今夜月橫笛有哀音

雨中

一室高原次遙天起夕風雨來汀樹外日沉山霧中
鳧鴈秋沙靜鷄豚委巷通白雲望不盡相對意無窮

寄雷長史

不見雷夫子相望歲半餘王門盛賓客仙府足圖書

賈傅才誰敵相如病獨居憐君兼吏隱休憶錦江魚

宿胡山人家

騎馬侵晨出看山至日昏鳴鷄千嶂裏高樹一家邨
白石斜通往清泉直到門祇疑人世外別自有乾坤

登堅山寺

西峯插天起絕頂寺門開雲裏一僧住山中無客來
落花平講席積草徧香臺我欲聞清楚焚香坐不回

寄焦太史蘊德

抱璞聲名舊逢時意氣殊麒麟出天廐騶馱在雲衢

世史稱司馬英詞繼董狐遙知東觀裏終日會文儒

寄馬君卿進士

憐君得意日騎馬向春風通籍金門裏公曹畫省東
宮袍唐進士陞戟漢郎中辭賦相如妙聲名誰與同

寄阮行人

夫子風流士高懷近若何張騫能奉使阮籍自行歌
文字留中岳樓船渡大河梁都看不遠枉駕幾時過

寄張季升給事

獨立當霄漢清譽在處聞朝趨青瑣闥日侍御鑪薰

溫室千年樹蓬萊五色雲同年還愧我天上早離群

寄孟望之

昔在長安日相看慰別顏君行太行谷予亦下燕關
春去無消息秋來書未還可憐骨肉夢常越萬重山

寄戴仲鵞進士

戴生久離別宦况近何如白日閒官舍青雲近 帝
居明時難自晦直道未應踈問我生涯事山中懶著
書

懷李獻吉二首

聞君在羅網古道正難行無使傳消息憑誰問死生
東方元太歲李白是長庚才大翻流落安知造物情

二

冠蓋京華地斯人獨可哀神龍在泥淖朱鳳日摧頽
世路無知己乾坤孰愛才梁園別業在何日見歸來

九日同諸友登賢隱山五首

九日西山上登臨思渺然高城過一鴈踈柳歇繁蟬
勝槩仍佳節同遊似往年休將竹葉盞空對菊花前

二

古寺來遊日高秋雲物清樓臺萬里目時序百年情
野樹斜侵郭河流曲抱城明年當此際誰與共題名
三

野望秋無賴西風城樹凋浮雲滿天地落日更蕭條
醉舞隨長劍哀歌逐短簫龍山高興者千載竟艱招
四

野寺空崖裏高臺舊國傍山川待我輦風日媚重陽
雲嶠秋臨迥松林暮倚長由來宋玉意搖落自悲傷
五

薄暮經行處千巖落照深孤松秀雲壑衆草莽寒林
故里登高興平居懷舊吟風前一感慨不異古人心

望京師寄王職方

北望依南斗長安萬里愁西風入上苑楊柳落金溝
雲近蓬萊閣天迴太液流仙郎歸畫省高詠接同遊
九日懷鐵溪

獨憶高夔府何時騎馬來一秋常卧病九日廢登臺
寂寞傳杯手淒涼作賦才陶家園內菊風雨為誰開
雨後次孟望之二首

斷雨藏深浦殘雲霽晚空人家亂水外野艇夕陽中
風急鳴江鶴天高落塞鴻滄浪浩歌起身世羨漁翁

二

萬里看無際高秋接素氛沙村昏片雨石壁斷孤雲
鴻鴈常求侶鳧鷖不離群寒山有落木風起暮繽紛

霜節

鼓角蒼山畔孤城此歲殘迴風夜不止清霜日以繁
未惜瓊樹晚還悲瑤草寒陽春在何日幽谷待鳴鸞
為王子悼亡

玉魄無消息星辰隔紫泉舞鸞沉寶鏡飛鴈落金鈿
不待中郎貴空傳上婦賢平生浣沙處流水恨潺湲

送穀先生之霍丘訪朱調元

客裏黃金盡天邊逐歲華寒燈具行李早飯出山家
東路蘼蕪滿西風楊柳斜朱君舊相識見爾惜生涯
送孫世其舉人歸華容二首

以爾聰明少吾生望未涯孤城常作客九月始還家
暮雨沉關樹寒風落渚花洞庭秋色裏為我弔長沙

二

爾去荊州府孤帆幾日開
山過宋王宅江到楚王臺
落鴈衝人起浮雲度水來
悲懷兼別緒歲暮若為裁
萬歲節

北望看辰極孤城首重回
祥雲九重殿仙露萬年杯
鳳輦通宵備龍旂拂曙開
侍臣金鑑錄誰有九齡才
任宏器過訪

磊落同鄉友相尋到水涯
山中沽白酒籬下覓黃花
積水寒天澗連峯夕照斜
興來高詠起揮翰滿烟霞
客至

野外逢迎少柴門落葉稠
人閑不掃室客到始梳頭
且為烹茶坐還因看竹留
登臨如有興更上水邊樓
上祖塋

故城西山繞佳城望轉幽
松寒迷唳鶴草暖集眠牛
不見邱原起空懷霜露愁
諸孫時掃謁哀淚灑松楸
上亡兄墓

阡垞還經歲音容不可追
幾時門吏散今日路人悲
壑有藏舟屢林餘挂劍枝
哀哀憐小弟難忘鶴鴿詩
訪賈西谷

儒宮入古檜泮水靜塵埃偶到閑宮舍能孤遠客杯
開門黃葉落展席清風來更喜庭前菊寒花日暮開

西郊秋興十首

立馬西郊地悲風慘澹生白楊落古墓黃葉下孤城
流水年年去浮雲日日行滄浪清若許聊可濯吾纓

二

谷口風兼雨茅齋淅淅秋寒烟浮島嶼白水亂汀洲
散地耽高卧何時作遠遊近來踈懶甚一月罷登樓

三

野屋清秋暮寒沙易朔風歲年悲老樹岐路感孤蓬
醉豈逃名士狂非避世翁尋常門自掩無客到山中

四

舊家瀨水上門向釣臺邊近市來沽酒中流坐放船
蒹葭開晚照洲渚接寒天漁父如相識長歌過我前

五

村居元舊業草舍僻臨城久雨蒼苔積閑門掃更生
窺人一鳥下見客衆雞鳴翻怪巢由輩空多世上名

六

蕭條萬峰裏門巷靜無譁積草惟三徑垂楊自一家
寒雲抱古木晚日媚殘花歲事看如此能教負物華

七

寂寞高臺畔空令故國存古人不可見遺迹更堪論
雲度孤城夕天連積水昏興亡向來事無處問乾坤

八

亭古楓杉落綠溪不奈秋西風怯纖絃細雨戀重裯
雙鷺寒窺井孤鴻晚過樓白鷗還有意相逐向吾洲

九

嚴風日以散落葉轉紛紛遠樹斜銜照寒山半入雲
步兵常嗜酒水部本能文悵望千秋上斯人亦不群

十

古人歌舞地今日幾豪華世事那能定吾生詎有涯
秋蟲不去戶寒鴈各依沙獨少高陽侶時時過酒家

賈長教舍白菊

君家白玉朶不數黃金花淡淡含秋色亭亭傲歲華
閑雲依檻靜明月傍壇斜偶坐題詩去寒香為爾誇

雪

一雪今冬早霏霏白滿沙隨風斜着樹帶雨不成花
曲檻寒仍裊空庭晚更加城中一萬戶歌舞是誰家
寄贈莊國賓

上館宜才子佳名玉葉光文章奪雲錦衣服惹天香
下筆驚鸚鵡吹簫跨鳳凰淮王門下客冠蓋日相望
至日二首

一卧鄉園晚頻看物候新冰霜寒近臘梅柳暗催春
直道何時泰生涯舊業貧蕭條一杯酒愁絕對佳辰

二

冉冉天時逼悠悠人事催坐觀群物變又見一陽回
遠樹朝暉發孤城凍霧開長安望不見迴首獨餘哀

長安月

萬里長安月曾看照綺羅徘徊留舞席宛轉逐遊珂
錦幌披青霧朱樓拂絳河佳人獨愁思終夕抱雲和
登釣臺四首

歲暮荒臺上孤高望不窮亂山浮落日遠水抱寒空
野鷺時親客江鴻晚避風終期謝城市來此伴漁翁

二

出郭冬初暮登臺日已曛碧潭寒吐月孤嶂晚生雲
名姓嫌人識悲歌欲自聞沙鷗莫飛去應共爾為群

三

古人棲隱地今日我重來寂寞千山裏烟波萬古臺
巖寒蒼桂落沙晚白鷗迴慷慨無人測長歌不放杯

四

薄暮登臺罷雲山興不忘門人携酒至日落更傳觴
一水星河渺孤烟島嶼長不愁歸路晚明月在滄浪

送荊先生二首

迢遞京華路憐君歲暮行一尊淮水上疋馬楚王城
白首家無定黃金藥未成蓬瀛如可涉約爾共逃名

二

季夏辭燕地經冬滯汝湄孤城一相送岐路不勝悲
為客江湖遠求仙歲月遲世途來不易相見更何時

送慈谿劉伯雨之南京尚寶卿

甸隔金陵迥天流銀漢斜江山迴帝宅牛斗上仙槎
拔擢符臺始聲名禮部選行看好春色留賞舊京花

何大復先生集卷十六

何大復先生集卷十七

五言律詩八十二首

荅望之二首

念汝書難達登樓望欲迷
天寒一鴈至日暮萬行啼
饑饉饒群盜徵求及寡妻
江湖更搖落何處可安棲

二

日落荒山畔孤城更可傷
生涯仍寂寞世事轉倉皇

百口同饑饉千村盡鬻狼知君憐老父南望白雲長

雪中簡賈長教

雲雪孤城暗深杯誰共揮霧中千樹失天上百花飛
濕蓋青氈冷光連素絳輝知君郢中曲高調和人稀

寄周明府

舊業燕京下何方更卜家知君能大隱城市即烟霞
商谷多芝草淮山有桂花相招空夢寐岐路滿天涯

贈韓亞卿返湖南二首

斧鉞辭燕闕簷帷駐楚宮使星天漢上鄉月洞庭中

劉晏經邦計蕭何餉士功歸朝論事業不愧古人風

二

送節初臨夏迴旌已逼年馳驅千里使經濟萬人傳
髮變江湖上身歸日月邊淮西困饑饉側望達堯天

得五清先生消息尚容澧州悵然有懷作詩六

首

憔悴東都士吾師更可嗟三年為逐客萬里未還家
暮阻巴山雪春行楚岸花江湖無路覓流涕望天涯

二

昔遇南來客曾傳北寄聲飄零携百口留滯傷孤城
澤畔騷人興周南太史情天高地仍遠衙謫竟誰明

三

洞庭西去路消息幾回聞地僻難逢鴈天長祇見雲
白蘋悲楚客斑竹怨湘君宋玉哀師意空傳九辯文

四

夫子先辭國嗟予亦罷官生涯同去住世事各悲懼
楚地江湖濶巴山道路難白頭慈母在雨雪更愁寒

五

跡為羈棲久身因放逐勞五溪淹日月三峽尚波濤
夢裏摧雙翼愁邊見二毛清風引歸袂名共蜀山高

六

儒行荆人識文章澧郡傳夷方仍俎豆客路半舟船
太守迎徐穉諸生仰鄭元獨憐門下士何日進彭宣

寄杭東卿

海內賓朋隔天邊涕淚遙一書無計達萬里更能招
碧樹東南地寒江日夜潮石梁如可度仙路坐相邀

送羅秀才歸省

汝念高堂母還家秋色深
遙知倚閭望應慰斷機心
落月清淮朗浮雲楚塞陰
西風吹匹馬惆悵送歸吟
寄張提學伯純

舊屬朝端望俱稱柱下才
九霄驄馬出千仞鳳凰來
河洛經中嶽星辰動外臺
山城有桃李花向幾時開
聞陸舍人子引罷官兼懷徐舍人德章

惜爾官難達文章本鳳毛
投簪歸海岸挂席起江濤
張翰元思繪任公且釣鰲
南逢徐孺子應話舊同袍
喜劉朝信過飲三首

坐惜芳菲晚何人到野中
相邀一尊酒來對百花叢
翡翠鳴春日遊絲墮碧空
誰知豔陽節爛醉與君同

二

西郭樓邊地春風亦可憐
落花寒食雨高柳夕陽天
岸幘行林側移樽坐水邊
啼鶯如有意數傷舞衣前

三

烟樹孤城外風花野水濱
群鷗不避客雙燕亦留人
况值清明後酣歌爛熳春
相看三月暮過我勿言頻
懷王舍人文熙

自我還鄉里無書到野亭江湖春浩浩鴻雁日冥冥
苑內花空發池邊草自青寧知同省客萬里各飄零

寄梁宗烈

憐君下第日即我挂冠時岐路千行淚浮雲萬里悲
天高南海柱地遠曲江祠處處豺狼鬪相逢未可期

送公順赴湖南有懷舊遊

雄勝稱三楚茲遊不可無入溪身更遠望嶽興難孤
江漢元朝海樓臺半入吳十年歷覽地夢繞岳陽湖

公順阻雨又贈

孤城三日住客子意何窮水國春多雨江沙晚更風
宦情臨漢上鄉夢到秦中幾欲相拚過清尊未得同

劉朝信讀書山寺

嗜靜山中寺藏傍此度年白雲千嶂裏清夜一燈懸
書卷留孤客盤飧傍老禪何時騎馬至訪爾古松邊

贈璽師

嗟爾離群友明心到灑然乾坤卓錫外日月轉輪前
覺路開無極迷川度有緣黃金留淨界萬世此燈傳

壽徐廣文

七十六年過悠悠湖海人青松高比節黃鶴健如身
子有徐卿貴官同鄭老貧春花歲滿眼常得醉佳辰
西谷有湖聘子喜其得勝遊因話湖中之勝

君向杭城去茲遊似馬遷應傳越客酒先泛楚人船
入郭湖天迥觀潮海月圓因君話禹穴高興亦飄然
送高子登赴試

倚馬高槐下行歌夕更繁夏雲連楚甸秋月滿梁園
題柱名千里登臺策萬言雲鴻天路求今日看飛翻
與徐生

念汝多風骨論文亦有神常懷萬里志須愛百年身
涉海方知水為山不讓塵眼前書史在無限古今人

送徐生赴試

爾到梁都日西風發醉歌秋深花近苑夜迥月臨河
姓擬傳霄漢身應謝薜蘿佳音附來鴈報我莫蹉跎

送張秀才還固安

十月燕山雪孤城易水風旅魂迷白草鄉淚劇丹楓
萬里書生筆千鈞壯士弓論文更好武何地汝成功

贈葛時秀

磊落元高士飛騰且壯年
驂騑萬里路鵬鷲九秋天
白璧先淹楚黃金晚入燕
春花爛熳日定醉曲江邊
奉寄泉山先生

館閣三朝舊江湖萬里長
北山高碑砥南斗極光芒
皓首歸難挽蒼生意未忘
春風舊桃李何日傷門墻
為李秀才壽母

寒歲開筵處佳辰對碧山
梅花似白髮萱草亦朱顏
志與和熊苦身因駕鹿閑
百年應自慰常見舞衣斑
送別劉朝信

萬里向天涯孤城對日斜
雲山共此別世路獨長嗟
暮雪燕關樹春風漢苑花
知君騎馬地名姓滿京華

寄任宏器
白髮三年客滄江萬里船
相思一回首懷抱即依然
碧草成詩夢桃花入醉眠
高車易傾覆何似廣文氊
送熊舉人

歲暮爾何適天涯誰共過
敝裘衝雨雪匹馬向關河
季子黃金盡安仁白髮多
燈前解雄劍長夜一悲歌
寄王甥朝良憂居

念爾憂居日山棲不到城下帷如董傳閉戶即孫生
苦塊冰霜重鷗鵬羽翼成人言爾似舅潦倒愧賢甥

壽李生父

五十五年人乾坤未老身佳辰近元日物色是新春
白髮何須變青山不當貧充問更有子莫厭酒觴頻

贈樊生鵬

羨汝非凡鳥群飛志豈安即看成羽翼何日起扶搏
丹徼通南極滄溟近北寒天風吹送爾九萬六何難
和賈西谷暮春雨後之作

溪雨清明過游雲薄遠空鷗喧春水至燕落晚泥融
麥秀千家暗桃花昨夜風獨憐艷陽日尊酒未能同

答劉朝信春日之作

聞君新歲作吾六念生涯翠麥纖纖細青楊裊裊斜
渴思春岸雨醉憶碧溪沙何日酬懽賞相邀共物華
九日袁惟學邀南園登高病不赴

經秋予卧病九日汝登臺悵望啼猿處無由躍馬來
暮天雙鴈落寒日一花開六有杯中物孤懷未易裁
三月七日同諸生出遊

九律集 卷十一
八
清晨招爾輩同出眺烟沙寒食孤村路春風萬樹花
藉蘭臨水曲折柳到山家獨少青尊共能無愧物華

九日震雷山懷望之

九日東山上思君江漢深故園頻宴會佳節自登臨
衆壑流雲氣孤峰落日陰應知楚山上獨賦望鄉吟

立春日憶京

此日憶京華孤城春望賒雲霄雙鳳闕歌舞萬人家
香脆金盤菜寒輕綵勝花繁華舊時事回首一長嗟

元日哭先人墓二首

春色松楸地淒涼望不窮一哀臨逝水痛哭起悲風
江海無歸路塵沙有斷蓬一杯元日酒空灑九原中

二

地下今安在人間春自來空餘萬行淚不盡百年哀
松柏開神路星河隔夜臺林鳥暮啼急佇立不能回
社前一日上先墓

莽莽乾坤濶悠悠歲月過極知恩似海空有淚懸河
巢燕營新壘林花發故柯春風如往日愁到此山阿

春望

荏苒青春望棲遲白日歌柳隨愁共結花與淚同多
異域猶戎馬吾生只薜蘿萋萋春草色依舊滿山河
春來

春來稀灑掃門徑碧苔滋積雨忘昏曉幽居感歲時
寒雲低旅鴈城樹暗黃鸝獨立傷春色蕭條萬事悲

寒食

沙岸青春雨風吹野水涯不沾寒食酒空映古墳花
城郭人烟細樓臺暮景斜東流爾何意滾滾送年華

清明

碧草晴川飄遊人興渺然歲時聊杖履兒女更鞦韆
沙白孤城日山清萬井烟風花暮無數片片落河邊

仲春二日

荒村春甲子暮雨散高天石壁臨斜景雲巖落暗泉
長官行問俗父老更占年早晚春濤至相將泛野船

晚晴

茫茫春水地斜日滿菰蒲隔水雲峰峻含風雪壁孤
晴光催谷鳥暝色下城烏仄徑漁樵過相逢亦我徒

春興

二月已過半三月來逡巡柳葉細可采桃花開太頻
白鳥過遊客黃鸝呼醉人紅顏樓上女端坐獨傷春

清明自先塋歸

感慨清明節留連野外尊
黃鳥鳴官路青山繞郭門
原下悽斷百年魂

過袁惟學南園集飲二首

始識南園路垂楊一徑斜
誰言此城市吾意即煙霞
客醉迷深竹鶯啼過別花
圖書一萬卷不異子雲家

二

獨坐春林暮飛花送酒杯
亭陰連水曲山照落城隈
萬竹當堦倚千峰繞戶迴
高人讀書處莫厭我頻來

同趙先生宿山家

同宿京華地今來又六年
那知風雪夜復此共床眠
水曲隣燈照山高石溜懸
中宵不成寐話舊各悽然

劉朝信西園

邀客西園內知君愛醉吟
相看二月盡無奈百年侵
春水桃花岸高亭橋樹林
晚來有幽意西望白雲岑

葉邦重山居

幽棲近蘭若來慰野人情戶外雙峰秀塔前衆壑平
鳥鳴春樹裏僧傍翠巖行日暮山鐘散相隨夜到城
飲邦重山莊夜歸

殘日暄歸騎漁樵仄徑逢煙中望北郭樹裏下西峰
深夜明林火蒼茫度水鐘朝來向城市誰憶白雲蹤
寺僧留宿

留宿頻經夜虛空斷俗緣獨吟依野衲不寐聽山泉
水月人間地香燈象外天何時謝城郭來此共安禪
別寺僧是日立春

別寺逢春日山盤野菜長老僧朝具飯留客更焚香
雨暮楓花靜雲寒栢樹蒼獨慚騎馬去塵事未能忘
出寺過胡山人家

細雨清沙路經行獨杖藜那知白社客更向碧山樓
花好圍牆散鶯嬌入院啼風光不能醉吟望轉淒迷
賢隱寺次劉朝信

翠壁青蓮界蒼苔白石關春來初出郭日暮更登山
歲月頻經眼煙霞可駐顏化城依宿處自覺此身閒
袁揮使別墅次朝信惟學韻

大德集 卷十一
出城山水地朋舊共斯遊吟倚將軍馬來乘老氏牛
桃花紅映郭柳色翠臨流寄語尋幽者無勞此外求
遊堅山阮生談西巖險絕予未嘗到

聞爾西巖上經行此路艱風高吹獨立雲細裊難攀
目送千峰盡身隨一鳥還更傳僧八十終日閉松關

夜酌黑龍潭二首

并序

予時相從者徐羅彭阮胡五人黑龍潭予嘗過望
見之未嘗到也是遊予白髮西山有此意而彭生
即携一壺酒馬上從予至則夜矣相與酌石上一

二行而徐生復不舍遂卒遊蓋甚奇也

川流一曲抱峭壁萬年開白石傳杯坐青天送月來
蛟龍亦自舞鷗鷺豈相猜誰識仙潭上天留此釣臺

二

百頃風潭靜澄波夜轉明江山一壺酒天地六人情
醉踏金鼇背潛窺玉鯉行龍宮月長滿何惜坐深更

留賈西谷學舍

獨院團雙檜清陰午更繁笙歌聊輟講市井不聞喧
壇杏當筵墜堦葵夾座翻憐君交誼重數到廣文園

王生館雨坐

獨坐王生館淒然歲暮心高城翻落照空院積寒霖
鴈鴛秋飛盡蛟龍夜吟西山舊松竹雲雪共蕭森
過先人墓示彭天章二首

三宿孤墳下肝腸爾獨知不禁桑梓淚難忘蓼莪詩
逝水有歸處白雲無盡期九原靈爽在相見是何時

二

少小承顏日恩深世所稀倉皇成永訣冥漠竟同歸
天地空形影音容有是非此身如寸草何以答春暉

同季升過李生書舍

避寇孤城裏君家數倒尊柳邊開草閣花下覓柴門
臺古如山郭塘幽似水村南鄰張給事常與坐黃昏

登西巖寺二首

西林禪誦地石壁倚天開曲磴千盤上飛泉一道來
園禽巢古殿野鹿過香臺共坐題詩暮山花落酒杯

二

野寺千峰裏遊人一徑深
松喧石澗水殿落翠巖陰
花樹三春暮山川百代心
天風日夕厲難上最高岑

遊賢隱寺

寂寂春山寺雙峰晝自陰
行吟白雲裏獨慰翠微心
石磴懸蘿暗巖亭雜樹深
還疑武陵口溪水入花林
過萬家庄

野屋水潺湲綠崖一徑攀
迴風吹落日臘雪滿寒山
千嶂啼猿裡孤峰騎馬還
蒼茫雲霧合無路覓禪關
訪堅山寺僧不遇

峭壁何年寺重來雪路迷
煙霞開寶地霄漢接丹梯
逼面千峰起回頭萬壑低
無人獨歸去惆悵白雲西

再至寺

山家晚飯罷清夜宿西林
古壁棲金象花宮出梵音
三生石上話萬劫世間心
獨愛寒岩柏蒼蒼一院陰

何大復先生集卷十八

五言律詩八十二首

登堅山寺絕頂真武廟二首

古廟堅山上丹青碧蘚封遊人不到處一老自鳴鐘
絕壁飛泉掛危峯曲逕通岩堯一以望頓覺世塵空

二

同來息心石不避捨身臺洞裡煙雲出窓中日月開

孤僧絕頂住遊客半空迴不盡登高興無人送酒來
懷西山

不到西峯久那堪病後情雲思丹壑卧花夢碧巖行
城郭邀來往朝廷問姓名人間自多事嘆息此浮生

自山家歸寺

暝色延歸路雲中見上方萬山懸馬首一徑入羊腸
暮雨橫沙界陰霞拂院墻更深磬管散身世樂何鄉
近寺

梵宇頻經處林深入磬聲懸崖攀葛上曲澗遶松行

花鳥還春日樓臺即化城亦知身是妄從此學無生

過書院二首

書院新開日文旌暫過時衣冠成小試絲竹更相隨
凍柳依高堞霜荷傍曲池夜來占寶氣應向斗牛知

二

駐馬高城畔酣歌送落梅風霜十月盡杯酒衆賓回
柳色含春動笳聲向晚催故園無限意行節為遲迴

登樓

孟夏遊茲地登樓慰所期樹陰深坐客花晚更題詩

六後集 卷十八 二
滿院紅榴散當簷白果垂風情真可住俗物苦相追
過杜家庄

山老頻邀客茅茨隔暮煙聞雞度絕嶠立馬看飛泉
種柳非無地栽麻亦有田謀生今已定不用卜居篇

獨坐

獨坐孤燈靜憂心倍寂寥橫河當戶轉落月去城遙
淚向何時盡魂從暗裏銷此身雖復在甘與歲時飄

獨立

鼓絕孤城掩溪傍春事殘岸霞晴映樹汀雨暮生寒

風外看花盡煙中望柳繁靜觀時物變獨立思千端

袁秀才書院芍藥

亦是傾城色開仍傍杏壇日遲深院落風轉曲闌干
不恨先桃李皆言勝牡丹春華惟在此遊客好相看

李秀才園中牡丹

此地無車馬名花亦自開何須照羅綺但遣絕塵埃
近水紅雲綻憑闌白日迴姚黃與魏紫空向洛陽栽

李秀才書屋冬菊花

萬樹皆零落亭亭獨自我根深飽霜雪花好爛池臺

短鬢煩相映孤懷為爾來
凡花與衆草歲暮不同開

趙生書堂竹

愛爾書堂竹青青耐久看到門
惟一徑入院迥千竿
雨映爐烟細霜生簾色寒
晚來幽獨興題句刻琅玕

梅

野水無人地寒梅獨自開
花疎間翠篠樹古積蒼苔
嶺雪春潛至林風香暗來
一枝猶可折橫笛暮休哀

懷賈長教壇上杏花

山城踈雨過綠草暗庭陰
坐愛三春樹懷君雙杏林

日長鳴鳥至風靜落花深
悵望高壇上何由共爾吟

櫻桃

滿郡櫻桃熟筠籠處處傳
千枝垂更密萬顆落仍圓
細瀉愁難破嘗新淚泣然
金盤賜朝士猶憶拜恩年

芍藥

芍藥春風晚開遲
莫自嗟城中雖有樹此外更無花
倚席低行月翻堦
鬪落霞佳人對瑤瑟一為惜年華

雙柏

雙柏種何歲蒼然盤據深
蛟龍猶有甲鸛鶴爾何心

月過陰移壁風生響度岑萬年烟霧裡長得護禪林
雪

莽莽黃雲起淒淒素雪浮堂深偏近燭院迥不依樓
喜見漫天舞愁看向日流更將三白兆一慰老農憂

聞雷

中宵巖電發二月始鳴雷落地殷仍起盤空劃欲迴
蛟龍入浦淑風雨過城隈獨坐明燈裡空堂萬慮催

曉起見雪

曙色空窓裡鳴禽更好音幽棲忘盥櫛偃卧問晴陰

卷幔山雲起開門野雪深不愁泥濘路騎馬度西岑

雨

疾雨衝城下春寒入暮催樹明捎落電山暗轉奔雷
正月花狂放三江鴈亂回國西兵馬急愁問羽書來

密雨

密雨過朝空山對寂寥久陰雷電蟄曠野虎狼驕
鷺立清沙近鷗行白水遙眼前常見汝俗物謾相招

漁樵

白石樵人路滄江漁父潯桃花夾兩岸松色映孤岑

坐傍鼉鼉窟行穿虎豹林古今問答意誰識邵公心

淮陰侯

夫將登臺貴三軍拔幟豪力能分楚漢功本冠蕭曹
故壘風雲偃空山虎豹號獨憐飛鳥嘆不及范生高

吹笙

寂寂花宮月何人吹玉笙響從銀漢落清過彩雲行
夜靜疑天籟更深入梵聲幽心與禪意淒切轉關情

廢屋

廢屋空山裡風沙不見人壞墻惟有徑獨樹更無隣

寇盜三關逼徵求萬國頻江湖暮搖落回首一沾巾

燕子

燕子今春到茅堂水郭西本無華屋志難向玉樓
雨細鳴相並風輕落故低淘河莫深訝只是為啼泥

病馬六首

柴公有名馬騎出自京華峻耳批雙竹奇毛散五花
老能知道路病已困泥沙貴賤誠如此長吟為爾嗟

二

此馬非凡馬曾酣百戰場聳身思剪拂馳志在騰驤

側立青雲迥悲鳴白日長君恩如不棄終擬報田方

三

從來西域種會是渥洼生不惜千金買寧辭萬里行
天寒思故道歲晚滯空城牽向閑階下長鳴意不平

四

老向關山裡龍媒世不知恩深思欲斷力盡淚空垂
首蒼辭天苑塵沙別月氏東郊望春草生意在何時

五

惜爾西來遠愁看更向東毛寒常帶雪骨瘦不禁風

惆悵臺邊士淒涼塞上翁徒聞穆天子八駿歷層空

六

跼蹐才難盡踟躕意若何沙寒首蒼短路晚蒺藜多
不復馳金市猶思歎玉河側身千里外常恐歲蹉跎

途中寄別錢送諸生

西路臨秋寺登臺憶送行風塵別汝輩江海本吾情
塞柳凝寒望關雲入暮征長安日不遠相見待諸生

送劉大理守衢州府

以下京集

西寺平反又南邦出守初高門廷尉宅五馬使君車

海岫晴浮越河關暮泊徐蒼生望杜母行駕莫躊躇

送馮大和

久客依親友深秋念此行
亦知彈劍缺不是愛冠纓
木落燕天鴈花催楚岸鶯
故山松柏樹何限女羅情

送石令之廣濟

萬古黃州水孤城赤壁山
仙鳧從此去賓鴈幾時還
柳澤春陰細琴堂晝日閑
知君忠孝志遺愛楚人間

送張子行

汝陽張季子冬暮獨南行
此去樓淮曲何時入漢京

龍劍雄雌別鯁池羽翼生
試看古名士多自少年成

元夜孫世其席上餞勤甫

京國上元夜相逢魂黯然
張燈非舊俗滿月是離筵
楚塞干戈外春城鼓角邊
同遊重令手海內各風煙

送謝邦用之湖南

同作燕京客君為楚上行
雲霄無舊侶江漢有深情
鼓吹春天樹樓船水國城
遙傳持憲使元是漢廷評

送呂子

京洛三年客雲霄萬里違
上書俱不報解珮獨先歸

大後集 卷一
北極臨燕甸南山繞漢畿相將未可料岐路斷蓬飛
送顧汝成赴浙江叅議

水部名元重藩叅位不輕十年垂紫綬萬里為蒼生
舟楫江邊驛旌旗海上城風塵尚未息慷慨望君行
李南陽宅餞子容

封王金冊節漢使玉堂英禮樂逢今日山川壯此行
渡江春草歇臨海夏雲生賓客南陽宅遥遥萬里情
送高穎之給事使楚道過揚州

諫垣初北上奉使且東還冠冕留仙宴江山慰客顏
節停淮海曲槎到斗牛間別後金門侶應懷玉殿班
餞子容

客館西垣靜開尊為汝歌檻花深晚坐城樹喜頻過
綵鷁春湖色驪駒白玉珂還鄉君信樂予奈別愁何
送鄒子之浙中訪迎張子

此去尋張子東行指宋畿秋城悵獨往春棹好同歸
雨外吳帆重江中越岫微平生壯遊興送汝益翻飛
送熊御史尚弼謝病還江西

晨車發 帝里秋棹返江鄉草奏孤臣淚懷歸久客

腸海鷗思避俗湖鴈喜隨陽攬轡平生志還山未可忘

送蕭升之任登州府學

廣文騎馬去東郡有花開日對蓬萊觀春登海上臺
人看鳴鳳下客擬釣鼇來莫謂儒官冷絃歌擁俊才

送王有鄰之趙州

大郡須才美君才美更多雙幡朱析羽五馬玉鳴珂
橋市連燈火城亭入芰荷兒童迎太守齊唱趙州歌
真空寺送人不及二首

尋僧憇古寺候客掩松門碧水城隅路青山塞口村
迴舟非盡興駐馬獨傷魂目送寒天鳥孤飛日易昏

二

古路城中斷荒原寺半開碧山從此去芳草為誰來
野送空臨水燕歌獨上臺林風暮吹急歸興颯餘哀

汝立席上送世其二首

故國思先往兵曹喜暫過江雲同楚望邊月自燕歌
市夜盤飡易城春鼓吹多一盃今對汝他日異關河

二

汝去來何日令予轉念家興同張季子愁異賈長沙
河塞行無雪江鄉到已花洞庭風浪濶漂泊問龍蛇
送以行往平山省外父母次韻

歲暮忽為別亦知非遠遊彩衣思孟里鳴玉向秦樓
岸雪晴含照林楓尚帶秋如憐早春色絲鞵返一

皇州

送劉子遊西山寺

我憶湖山寺春山爾獨行乍暄饒柳意空谷自鶯聲
人減同遊伴花含往歲情片雲回首暮天遣別愁生

送王生還嵩盟兼訊趙叔

此向嵩州去遙看溟海窮行人三月盡獨馬萬山中
雪嶺銜西日春沙起北風傳書問故舊天地一冥鴻

送施聘之御史南還

翮翼青冥去高秋隻隼孤許身酬日月垂淚向江湖
事業臺中草生涯水上蒲他年問書札滄海一潛夫

送王判之永州

日出楚帆高秋行不覺勞衣裳南岳霧舟楫九江濤
謝傳非忘殺王祥已佩刀雲霄北萬里風便一鴻毛

送李令赴宜城

名邑今為宰東行更屬秋青天見海岱明月下河洲
柳傍彈琴坐花隨放鳥遊蒼生未蘇息須拜富民侯
送韓仲子並訊其弟季子二首

昔別留談數今行出餞遲萬人皆涕淚四海一瘡痍
花映投簪日風流攬轡時西雲暮不斷遙起漢關思

二

令弟先君往伊予實嘆嗟竄身還故里避世入山家
斜日秦城柳繁烟渭曲花豈知燕地客騎馬日風沙

送兄二首

兩兄憐小弟千里會長安曉向蘆溝別宵追松寺懽
風回鴻鴈急雪度鶴鴿寒暫聚遙今散臨岐忍淚看
二

風蓬皆萬里骨肉我三人岐路緣何事他鄉愧此身
柳含燕甸色花隔楚園春佇望行車遠迢迢起暮塵
送曾建昌取道還瀘州

之官懷印綬過里訊松筠峽纜牽瀘水天梯截少岷
雲山蟠越嶠錦樹雜冬春目極西南日高歌動我神

送郭進士告歸大梁

病卧歸夷梁瞻雲佇太行金門謝通籍漢署憶含香
沙柳繁臺閣春花宋苑墻古園風竹動瀟灑讀書堂
送沙河方令

野曠孤城出山高上黨今春沙平落日古樹密屯雲
桃李今年種絃歌此地聞未須愁簿領應不廢詩文
送賈郡博之階州

十載一儒官西行路復難羗夷應俎豆邊徼有衣冠
隴坂盤雲上秦城向斗看好音懷萬里早晚報長安

送汪二司業還南京二首

帝宅龍盤內儒林鳳覽中此來名益重相送意無窮
畿甸江山抱宮墻日月通仙舟上南斗攀望彩雲空
二

溟漲開鯨力雲霄列鴈行中朝貴昆弟時論有輝光
柳別金門色花携玉殿香佇聆前席問獻納在明堂
送楊子濬下第還廣東

憐君不得意春盡獨還家路入蘼蕪草亭深枳殼花
客舟江上遠鄉樹嶺南斜盛世多遭際寧容問釣魚

別王秉衡

逸氣如孤鶻長凌萬里雲
賈生能抗疏司馬善為文
歲月交心舊山川別思紛
城南相送罷消息幾時聞
送楊驛丞

聞說丹河地孤城海上開
鹵烟出市井潮影動樓臺
漢使傳宣過夷官入貢來
皇華歌送客應闕出群才

送江華州

為郡稱先子承家氣益豪
少年乘五馬何夜夢三刀
天入黃河迥雲開華岳高
古來名勝地此日羨賢勞

送都元敬主事二首

夫子風流士才高耻受樊
長貧思故里多病乞文園
落日空山暮清霜十月繁
脩程正迢遞努力為加餐

二

此別何時晤佳期難重尋
扁舟南國遠歲晚大江深
白首三年客滄洲萬里心
平沙有歸鴈並起送離音

送戴生歸獻縣

旅室蒼苔靜寒城月色陰
歸人對明燭別調入瑤琴
渤海高雲夕滹沱積雪深
趨庭知有日應慰倚門心

送曹瑞卿謫尋甸二首

逐客滇南郡雲天此路長
高秋行萬里落日淚千行
作賦投湘水題書寄夜郎
殊方氣候異去矣慎風霜

二

一封朝北極萬里暮南溟
地遠投蠻府天高哭漢庭
旅情生白髮行色傷秋星
若過湘潭上休看杜若青

何大復先生集卷十八

